

ZAHD BIN ABD AZIZ
lwn
RASHIDAH BINTI ABD RAHMAN

[Mahkamah Rayuan Syariah Negeri Selangor, YAA Dato' Haji Mohamad Shakir bin Abdul Hamid (Pengerusi), YA Puan Hajah Noor Hadina binti Ahmad Zabidi (Ahli Panel) dan YA Dato' Haji Mohd Nadzri bin Abdul Rahman (Ahli Panel)]

Pada: 22 Oktober 2024/19 Rabiulakhir 1446H

Kes Rayuan Mal No.: 10000-016-0139-2020

[Rayuan Mutaah di bawah seksyen 58 Enakmen Undang-Undang Keluarga Islam (Negeri Selangor) 2003]

Peguam Syarie Perayu: Tuan Muhammad Shamsyuar bin Jasmim
Tuan Mohd Nur Firdaus bin Mohd Kamal
(Tetuan Syamsyuar & Associates)

Peguam Syarie Responden: Dato' Dr.Mohd Zaidi bin Md Zain@Zakaria
Puan Norhafizah binti Ramli
(Tetuan Zaidi Zain & Associates)

ALASAN PENGHAKIMAN

PENDAHULUAN

[1] Perayu telah mengemukakan rayuan ini melalui notis rayuan bertarikh 22/12/2020 terhadap keseluruhan keputusan Hakim Mahkamah Tinggi Syariah di Shah Alam (selepas ini dirujuk sebagai "YA Hakim Bicara") dalam kes Mal Saman No: 10400-016-0459-2017 pada 15/12/2020.

[2] Pada tarikh tersebut, YA Hakim Bicara telah mengeluarkan perintah sebagaimana berikut:

- i. Mahkamah meluluskan permohonan Plaintiff berdasarkan Seksyen 58 Enakmen Undang-Undang Keluarga Islam (Negeri Selangor) 2003.
- ii. Mahkamah memerintahkan Defendan membayar kepada Plaintiff sebanyak RM56,875.38 sebagai bayaran mutaah dan suguhati perceraian.

FAKTA KES

[3] Perayu dan Responden telah berkahwin pada 2/6/1987 di Batu Pahat, Johor dan bercerai kali pertama pada 13/12/1997 namun telah ruju' pada 22/1/1998. Pihak-pihak kemudiannya telah bercerai kali kedua secara fasakh pada 10/10/2016 di Mahkamah Rendah Syariah Hulu Langat, Selangor. Hasil perkahwinan, pihak-pihak dikurniakan 3 orang anak lelaki dan seorang anak perempuan.

[4] Pada 14/9/2017 Responden telah memfailkan tuntutan mutaah terhadap Perayu melalui Kes Mal No.: 10400-016—0459-2017 sebanyak RM300,000.00. Perayu yang tidak bersetuju dengan tuntutan tersebut telah memohon melalui tuntutan balasnya agar tuntutan Responden ditolak dengan alasan perceraian yang berlaku adalah berpunca daripada Responden.

[5] Selanjutnya pada 15/12/2020 YA Hakim Bicara telah membuat keputusan sebagaimana terma yang dinyatakan pada perenggan [2] di atas. Tidak berpuashati dengan keputusan tersebut, Perayu memfailkan notis rayuan pada 22/12/2020 dan kemudiannya diikuti dengan alasan rayuan pada 26/10 2022.

ALASAN RAYUAN

[6] Merujuk kepada muka surat 208-209 Rekod Rayuan, Perayu memplidkan 2 alasan sebagaimana berikut:

- i. YA Hakim Bicara telah terkhilaf dari segi fakta dan Hukum Syarak apabila memutuskan untuk meneliti punca perceraian yang berlaku tanpa menimbangkan tindakan Responden (Plaintif) yang nusyuz apabila apabila keluar rumah tanpa izin dan pengetahuan Perayu (Defenden).
- ii. YA Hakim Bicara telah terkhilaf apabila memutuskan Perayu membayar sejumlah RM56,875.30 kepada Responden (Plaintif) tanpa mempertimbangkan dakwaan Perayu (Defenden) menerusi perbicaraan penuh dan ruang untuk Perayu mengemukakan bukti berkenaan kemampuan Perayu (Defendan).

ISU

[7] Bagi maksud rayuan ini, kami telah merujuk keseluruhan rekod rayuan serta hujahan bertulis kedua-pihak dan mendapati hanya [2] isu yang berbangkit di hadapan kami untuk diputuskan iaitu:

- i. Sama ada YA Hakim Bicara terkhilaf apabila memutuskan Responden layak mendapat mutaah atau tidak.
- ii. Sama ada kadar mutaah yang diputuskan oleh YA Hakim Bicara adalah wajar dan munasabah atau tidak.

ULASAN MAHKAMAH RAYUAN SYARIAH

Isu Pertama: Sama ada YA Hakim Bicara terkhilaf apabila memutuskan Responden layak mendapat mutaah atau tidak.

[8] YA Hakim Bicara dalam alasan penghakimannya membuat dapatan Responden berkelayakan mendapat mutaah walaupun perceraian yang berlaku adalah secara fasakh. Selain itu, Responden juga tidak pernah dibuktikan melalui perintah atau sabitan mahkamah bahawa Responden adalah seorang isteri yang nusyuz. Oleh itu, Responden menepati kehendak seksyen 58 Enakmen Undang-Undang Keluarga Islam (Negeri Selangor) 2003 yang melayakkannya menerima mutaah.

[9] Perayu secara umumnya berhujah YA Hakim Bicara telah terkhilaf apabila membuat dapatan sedemikian. Menurut Perayu, Responden adalah tidak layak mendapat mutaah disebabkan perceraian fasakh yang berlaku berpunca daripada tindakan Responden yang telah keluar daripada rumah kelamin. Tuntutan fasakh yang difailkan oleh Responden juga diluar pengetahuan Perayu. Selain itu Responden menyatakan bahawa tiada nas Syarak yang jelas menunjukkan hak mutaah wajib diberikan kepada seseorang isteri yang menuntut perceraian secara fasakh atau tebus talak.

[10] Responden yang bersetuju dengan ulasan YA Hakim Bicara pula dalam hujahannya menyatakan bahawa sungguhpun perceraian fasakh difailkan olehnya sendiri, namun ia berpunca daripada tindak tanduk Perayu dan bagi mengelakkan kemudaratan kepada Responden. Oleh itu, ia adalah suatu tindakan yang wajar dan tidak menggugur haknya untuk mendapat mutaah. Perayu sendiri pada bila-bila masa tidak pernah mempertikaikan sabitan fasakh tersebut apabila tiada sebarang rayuan

mahupun semakan dibuat. Berkenaan isu nusyuz, Responden menegaskan Perayu sama sekali gagal membuktikan hal tersebut melalui pengemukaan perintah mahkamah.

[11] Bagi memutuskan isu ini, kami telah merujuk kepada Seksyen 58 Enakmen Undang-Undang Keluarga Islam (Negeri Selangor) 2003 yang memperuntukkan:

58. Mut'ah atau pemberian saguhati kepada perempuan yang diceraikan tanpa sebab yang patut.

Selain daripada haknya untuk memohon nafkah, seseorang perempuan yang telah **diceraikan tanpa sebab yang patut** oleh suaminya boleh memohon mut'ah atau pemberian saguhati kepada Mahkamah, dan Mahkamah boleh, selepas mendengar pihak-pihak itu dan apabila berpuas hati bahawa perempuan itu **telah diceraikan tanpa sebab yang patut**, memerintahkan suami membayar sejumlah wang yang wajar dan patut mengikut Hukum Syarak.

[12] Dalam kes **Tuan Farizah bt. Tuan Ludin lwn Mohd Razuhan b. Abdul Razab (2007) JH 24(2) 335** Mahkamah Rayuan Syariah Kelantan telah memetik apa yang dinaskan dalam kitab *I'alah at-talibin*, Juz 3 hlm 356 yang menyatakan:

“Bayaran mutaah wajib ke atas suami yang telah menceraikan isterinya setelah disetubuhi di mana perceraian itu **bukan berpunca daripada perbuatannya (isteri) seperti isteri murtad atau difasakhkan nikah disebabkan keaiban suami atau isteri**”.

[13] Panel Rayuan dalam kes tersebut telah menjelaskan apa yang dimaksudkan “suami telah menceraikan isterinya” itu ialah seperti perceraian biasa sama ada dengan persetujuan bersama atau sebagainya

dan juga apa yang dimaksud dengan perbuatan isteri di sini ialah seperti isteri murtad atau dia pohon fasakh nikahnya dengan sebab keaiban suami seperti suami gila atau mati pucuk atau suami seorang yang papa dan sebagainya. Begitu juga jika difasakhkan nikah oleh suami dengan sebab keaiban isteri seperti alat kelaminnya terdapat 'ratqun' (ketumbuhan daging) atau 'qarnun' (ketumbuhan tulang).

[14] Bagi memperkukuhkan lagi dapatan ini, kami turut merujuk kepada kes **Piah binti Said lwn Che Lah bin Awang PP (1982) JH 2(3) 220** yang mana Panel rayuan Syariah menjelaskan:

“Mutaah adalah pemberian yang bertanggung ke atas seorang suami yang menceraikan isteri. **Tanggungan mutaah tidak gugur dalam apa-apa pun perceraian berlaku kecuali jika perceraian itu disebabkan keaiban di pihak isteri terhadap suaminya atau perceraian kerana mati.**”

[15] Dalam kes **Norma @ Normek lwn Mohd Zain Abdullah, [2005] 1 CLJ (Sya)**, Mahkamah Rayuan Syariah Negeri Kelantan telah memutuskan bahawa seorang isteri yang diceraikan berhak untuk menuntut mut'ah. Dengan merujuk kepada kitab I'aanah al-Tholibin, karangan Sayed al Bakri pada Juzu' 3 halaman 406 cetakan Darul Fikir, Beirut, Lebanon:

تجب عليه لزوجته موطوءة ولو أمة متعة بفراق بغيري سببها وبغيري موت أحدهما

“Bayaran mutaah wajib ke atas suami kepada isterinya yang diceraikan setelah disetubuhi walaupun seorang hamba di mana **perceraian itu bukan berpunca dari perbuatan isteri (seperti isteri murtad atau difasakhkan nikah disebabkan keaiban suami atau isteri) dan perceraian bukannya disebabkan kematian salah seorang suami isteri**”.

[16] Dalam konteks kes di hadapan kami ini, alasan-alasan perceraian yang menghalang hak mutaah kepada Responden seperti yang dinyatakan

dalam autoriti-autoriti di atas tidak wujud. Sungguhpun perceraian pihak-pihak berlaku secara fasakh, namun ia disabitkan dengan alasan kecuaiian Perayu memberi nafkah dan bukan disebabkan kepapaannya (*iksar*). Oleh itu kami berpuashati dan bersetuju dengan YA Hakim Bicara bahawa Responden adalah seorang isteri yang telah diceraikan tanpa sebab yang patut menurut kehendak seksyen 58 EUUKIS 2003 dan dengan itu layak menerima mutaah.

[17] Berhubung dengan isu nusyuz pula, kami berpendapat ia bukanlah suatu alasan yang boleh menafikan hak Responden untuk mendapatkan mutaah. Kedudukan prinsip ini telah mantap berpandukan kes-kes terdahulu antaranya kes **Tengku Anum Zaharah lwn Dato Dr. Hussien bin Mohamad Yusof (1980) JH 3 125, Piah binti Said lwn Che Lah bin Awang PP (1982) JH 2(3) 220 dan Rokiah bt. Hj. Abdul Jalil lwn. Mohd Idris Syamsuddin [1990] JH 7(1) 112.**

[18] Dalam kes **Rokiah bt. Hj. Abdul Jalil [supra]**, Lembaga Rayuan Mahkamah Syariah Wilayah Persekutuan antara lain telah menyatakan seperti berikut:

“Dalam kes ini jelas penceraian itu berlaku dengan talaq oleh suami sekalipun ada tanda-tanda nusyuz tetapi **nusyuz tidak menafikan hak mutaah sekiranya ini berlaku.**”

Berdasarkan autoriti-autoriti ini kami berpandangan persoalan sama ada Responden pernah disabitkan nusyuz atau tidak sudah tidak berbangkit.

Isu Kedua : Sama ada kadar mutaah yang diputuskan oleh YA Hakim Bicara adalah wajar dan munasabah atau tidak.

[19] Perayu berhujah YA Hakim Bicara telah terkhilaf apabila memutuskan kadar tersebut tanpa mempertimbangkan kemampuan Perayu. Menurut Perayu, sungguhpun semasa perceraian pendapatannya sebagai juruterbang adalah sebanyak RM19,140.35 sebulan namun setelah ditolak segala komitmen keluarga, gaji Perayu hanya berbaki kira-kira RM2000.00 sahaja setiap bulan. Namun begitu, secara alternatif Perayu menawarkan untuk membayar kadar minimum 30 dirham iaitu sebanyak RM18,950.00 kepada Responden sekiranya Mahkamah ini masih berpandangan Responden layak mendapat mutaah.

[20] Responden pula menghujahkan bahawa YA Hakim Bicara telah membuat pertimbangan yang wajar berkenaan kemampuan Perayu. Menurut Responden pendapatan kasar Perayu semasa perceraian adalah sebanyak RM25,967.00 dan setelah ditolak EPF, SOCSO serta PCB masih berjumlah RM19,140.35. Manakala lain-lain komitmen yang dinyatakan adalah bersifat perbelanjaan mewah dan bukan keperluan asas. Oleh itu, Responden menegaskan YA Hakim Bicara tidak terkhilaf apabila memutuskan Perayu adalah seorang yang berkemampuan untuk membayar mutaah sebagaimana kadar yang diputuskan.

[21] Bagi memutuskan isu ini, kami sekali lagi telah merujuk keseluruhan alasan penghakiman khususnya pada muka surat 202-204 rekod rayuan. Dapatan kami YA Hakim Bicara telah memberi pertimbangan kepada faktor kemampuan Perayu. Hal ini dapat dilihat apabila YA Hakim Bicara telah mengambil kira pengakuan Perayu sendiri berkenaan pendapatan kasarnya sebagai seorang juruterbang. Sungguhpun begitu, jumlah sebenar komitmen bulanan Perayu tidak dapat ditentukan secara jelas apabila ia gagal dibuktikan secara satu persatu.

[22] Selain itu, kami turut mendapati YA Hakim Bicara juga telah mempertimbangkan sifat, perwatakan serta status sosial Responden dengan menyifatkannya sebagai golongan sederhana. Ulasan berkenaan dapat dilihat pada perenggan [39] dan [40] alasan penghakiman (Rekod Rayuan muka surat 18-19]. Berdasarkan dapatan ini, kami berpuashati bahawa YA Hakim Bicara sebenarnya telah mengulas kemampuan Perayu dan faktor-faktor lain berdasarkan hukum Syarak.

[23] Apa yang menjadi persoalan di hadapan kami adalah sama ada jumlah RM56,875.38 yang diputuskan adalah suatu kadar yang munasabah atau sebaliknya. Penelitian kami kepada keseluruhan alasan penghakiman YA Hakim Bicara mendapati kadar tersebut diperolehi dengan merujuk pandangan tanda aras sesuatu bayaran mutaah adalah tidak kurang daripada 30 dirham. Pada masa perceraian, nilai tersebut bersamaan RM18,958.46. Justeru, dengan mengambilkira faktor tempoh perkahwinan dan pengorbanan Responden dalam rumahtangga selama 29 tahun maka kadar mutaah yang wajar adalah **tiga kali ganda** daripada jumlah tersebut yang menjadikan jumlah keseluruhan adalah sebanyak RM56,875.38.

[24] Berhubung dengan pemakaian kaedah ini, kami berpandangan ia tidaklah mengikat kami secara ketat. Dalam hal ini kami bersetuju dengan pandangan Panel Mahkamah Rayuan Syariah dalam kes **Mohd Arifin Bin Nan @ Adnan lwn. Raden Mas Hasfarizan Binti Raden Jumari, Kes Rayuan (Wilayah Persekutuan) No.: 14000-016-0054-2017** (Belum dilaporkan) dan juga kes **Ismail Bin Adam lwn. Jafizah Binti Ashahak Kes Rayuan (Selangor) No. : 10000-016-0129-2018** (Belum dilaporkan) yang menyatakan bahawa –

“[11]....Persoalan samada mutaah itu hendaklah tidak kurang daripada 30 dirham adalah perkara ijtihadiah dan lagi pun ianya hanya **dihukumkan sunat sahaja** di kalangan sebahagian fuqaha’ dan **Mahkamah boleh menjadikannya sebagai panduan namun tidak terikat dengannya**. Oleh yang demikian, Mahkamah boleh menentukan suatu kadar mut’ah sama ada kurang daripada 30 dirham atau pun lebih daripada 30 dirham itu.”

[25] Dalam kedua-dua kes tersebut, ia dihukumkan sunat dan selari dengan apa yang dinaskan dalam kitab *Al-Iqna’* juzu’2 halaman 272 yang antara lain menyatakan:

ويسن أن لا تنقص عن ثلاثين درهما أو ما قيمته ذلك

“dan **disunatkan** agar tidak kurang (mutaah ini) daripada 30 dirham ataupun sesuatu yang nilai yang sepadan”

[26] Persoalan selanjutnya yang timbul adalah apakah maksud nilai 30 dirham dalam nas tersebut. Dengan hormatnya kami merujuk kepada kes **Zainuddin bin Syed Mohamed lwn Salmah binti Jamaludin (Kes Rayuan Mal No.: 10000-016-0100-2015 -Belum Dilaporkan)**. Dalam kes ini Mahkamah Rayuan Syariah Negeri Sembilan telah memberi penjelasan dengan menyatakan:

“[18] Sehubungan dengan itu, kami berpandangan bahawa apa yang dikehendaki daripada perkataan dirham daripada nas di atas ialah **mata wang yang ditempa daripada perak (mata wang perak) dan ianya bukanlah dinar (mata wang emas)**. Oleh kerana dirham merupakan mata wang perak maka **apa jua pengiraan nilainya perlulah bersandarkan kepada harga logam perak dan bukannya emas.....**”

[27] Berdasarkan autoriti ini adalah jelas bahawa penilaian 30 dirham sepatutnya berdasarkan penilaian perak. Namun begitu, penelitian kami

mendapati YA Hakim Bicara telah membuat penilaian berdasarkan nilai emas semasa perceraian berlaku. Hal ini dapat dilihat dengan merujuk kepada alasan penghakiman (Rekod Rayuan muka surat 13) yang antara lain menyatakan:

“[32] Seterusnya jumlah tersebut hendaklah didarabkan **dengan nilai atau harga emas semasa di pasaran tempatan** bagi mendapatkan nilainya di dalam Ringgit Malaysia (RM). Di dalam kes ini, Mahkamah seterusnya merujuk kepada **harga emas** yang dinyatakan oleh Bank Negara Malaysia melalui sesawangnya (<http://www.bnm.gov.my>) 1 aun@oz emas bersamaan RM5,332.00 pada tarikh perceraian pasangan ini (10.10.2016)”...

[28] Berpanduan ulasan tersebut, kami berpendapat YA Hakim Bicara telah terkhilaf apabila membuat penilaian sedemikian yang kemudiannya telah digandakan pula sebanyak tiga kali ganda. Walaupun kami tidak terikat untuk menggunapakai prinsip ini, namun kami percaya kadar menjadi lebih rendah sekiranya pengiraan dibuat berdasarkan nilai perak. Oleh yang demikian, adalah wajar untuk kami campur tangan dengan membuat penilaian semula berdasarkan kriteria-kriteria yang ditetapkan oleh hukum Syarak.

[29] Panduan kepada kriteria-kriteria ini antara lain sebagaimana dijelaskan dalam **kitab I’anah al-Talibin, juzuk 3, muka surat 595** yang kami petik:

فإن تنازعا قدرها القاضي بقدر حالهما من يساره وإعساره ونسبها وصفتها

“Sekiranya berlaku perselisihan mengenai kadar mutaah yang patut dibayar oleh suami kepada isterinya, maka hakim hendaklah bertindak sebagai penentu kadar mutaah itu berdasarkan kriteria-kriteria berikut, **kesenangan suami, kesusahan suami, keturunan isteri dan sifat isteri itu**”.

[30] Faktor-faktor ini telah menjadi prinsip yang mantap dalam menentukan kadar mutaah dan digunapakai dalam kes-kes sebelum ini. Antaranya kes **Mohd. Nasran b. Omar lwn Siti Hasliani bt. Mohd. Sani [2013] 2ShLr 1**, Mahkamah Rayuan Syariah Terengganu telah menyatakan seperti berikut:

“Dengan itu pertimbangan pertama dalam menentukan kadar mut’ah ialah kemampuan perayu. Oleh kerana tidak dibuktikan bahawa perayu mempunyai pendapatan lain selain dari pendapatan tetapnya, maka **pendapatan tetap bulanan perayu semasa perceraian wajar dijadikan sebagai kayu pengukur kadar mut’ah yang diberikan kepada penentang**. Pertimbangan seterusnya adalah keturunan isteri dan sifat-sifat isteri.”

[31] Manakala dalam kes **Faridah bt. Sulaiman lwn. Mohd Noh b. Othman JH19(i) hlm 136** Mahkamah menjelaskan:

“Mutaah diambilkira semasa berlaku perceraian atas **kemampuan suami atau ada juga pendapat yang lain mengatakan diambilkira taraf kedua-dua pihak** tetapi walaubagaimanapun, tentang kadar mutah mengikut al-Quran yang dikemukakan diambil kira di atas **kemampuan suami** ketika berlaku perceraian.”

[32] Fakta menunjukkan semasa perceraian berlaku, Perayu adalah seorang juruterbang dan berpendapatan kasar sebanyak RM19,140.35 sebulan. Manakala Responden pula semasa berkahwin adalah seorang kakitangan bank dan kemudiannya telah berhenti kerja untuk menumpukan perhatian kepada keluarga. Selain daripada itu tidak banyak fakta khusus didedahkan berkenaan sifat-sifat Responden dan taraf kedudukan sosialnya. Justeru, *inferen* yang boleh dibuat adalah Responden seorang isteri yang bertaraf sederhana dalam masyarakat, berpendidikan dan pernah bekerja.

[33] Dalam kes **Ilyas @ Alias Bin Mohd Amir lwn Rohani Bt. Md. Ninggal Kes Rayuan Mal No.: 10000-016-0100-2015 (Belum dilaporkan)** Mahkamah Rayuan Syariah Negeri Selangor menyatakan:

“[42] Pada hemat kami kemampuan pembayar hendaklah menjadi keutamaan sebagaimana maksud ayat 236 Surah al-Baqarah. Sekiranya bekas suami bukanlah seorang yang berpendapatan lumayan dan terlalu tinggi, **kadar nilai 30 dirham yang digandakan tersebut adalah terlalu tinggi dan akan membebankannya.**

[34] Kami menarik perhatian pihak-pihak bahawa autoriti-autoriti yang dinyatakan jelas menunjukkan bahawa secara prinsipnya tuntutan mutaah bukanlah bersifat pampasan, penambahan harta atau keuntungan kepada bekas isteri. Sebaliknya ia merupakan saguhati yang diberi berasaskan kemampuan bekas suami dan sifat-sifat isteri dengan tujuan memulihkan emosi isteri yang terkesan akibat perceraian. Dengan mengimbangi faktor-faktor ini, maka kadar yang diputuskan seharusnya tidak terlalu berlebihan-lebihan atau terlalu berkurangan.

KESIMPULAN

[35] Kami berpuas hati bahawa Responden berkecualan menerima mutaah. Sungguhpun begitu, kadar yang telah diputuskan adalah berlebihan dan kurang tepat dari segi prinsip, undang-undang dan hukum Syarak serta diluar lingkungan kemampuan Perayu. Justeru, menjadi tanggungjawab kami untuk memperbetulkan kekhilafan tersebut dengan menetapkan suatu kadar yang lebih munasabah dan difikirkan adil kepada kedua-dua pihak.

KEPUTUSAN

SETELAH membaca dan meneliti alasan-alasan rayuan Perayu, , rekod rayuan dan hujah bertulis pihak-pihak, MAKA kami sebulat suara memutuskan seperti berikut:-

Terma 2 Perintah Mahkamah Tinggi Syariah Selangor di Shah Alam dalam kes Mal Saman No: 10400-016-0459-2017 pada 15/12/2020 dipinda kepada "Mahkamah memerintahkan Defendan membayar kepada Plaintiff sebanyak RM30,000.00 sebagai bayaran mutaah."

Penghakiman ini dibaca dan ditandatangani oleh;

.....

1. YAA DATO' HAJI MOHAMMAD SHAKIR BIN ABDUL HAMID

Pengerusi,

Panel Hakim Mahkamah Rayuan Syariah Negeri Selangor

Dipersetujui oleh;

.....

2. YA PUAN HAJAH NOOR HADINA BINTI AHMAD ZABIDI

Panel Hakim Mahkamah Rayuan Syariah Negeri Selangor

Dipersetujui oleh;

.....

3. YA DATO' HAJI MOHD NADZRI BIN ABDUL RAHMAN

Panel Hakim Mahkamah Rayuan Syariah Negeri Selangor